

# INUIT ATAQATIGIIT

## INATSISARTUNI



Nuuk, d. 4. februar 2015

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga:

**KNR-ip sumiiffimmi radiomik "Voice of Greenland"-imik pisineranut atatillugu Naalakkersuisunut apeqqutit:**

**1: Radioqarfiup KNR-ip pisiareqqammisaata "Voice of Greenlandip" nunarput tamakkerlugu tusarnaarneqarsinnaalernissaanut KNR-i naatsorsuuteqarpa?**

**2: Nuna tamakkerlugu radiokkut TV-kkullu ingerlatsiviup kiffartuussiffiusussap pisortanit tamakkiisumik aningaasalersorneqarnera eqqarsaatigalugu sumiiffinni radioqarfinnik ikilisiaaqataanissaanut Naalakkersuisut isumaqataappat?**

**3: KNR radiokanalimik pisinermigut aallakaatitsinissamut akuersissummik qulakkeerinneqaaqaarani ingerlatsisimanerpa, tamannalu KNR-imut qanoq kinguneqassava?**

**4: Soorlu KNR-ip pisortaata tusagassiuutinut nalunaarutigisimasaatunngooq, sumiiffimmik radiomik "Voice of Greenland"-imik KNR-i pisinermigut sulisui tigummiinnassavai?**

**5: KNR-ip radioqarfimmit KNR-imi sulisumit pisinnginnermini radioqarfiup qanoq naleqartigineranik kukkunersuisartunit naliliisitsisimanera toqqissisimanarpoq. Taamaattorli pisisup aallakaatitsinissaminut akuersissuteqareerpera aallaavigalugu kukkunersuisartut naliliisimanerpat, tamannalu akiata naliliiffiqineqarneranut qanoq isumaqarpa? Taava tunisisup allanut tunisigaluaruni aki taanna atuinnaarsimassagaluarnerpaa? (KNR-itut aallakaatitsinissamut akuersissuteqanngitsumut)**

**6: KNR-i ussasaarutitigut ukiumut 1 mio. kr.-inik isertitaqarsinnaanissaanik naatsorsuutiginninneq KNR-ip radioqarfimmik pisineranut qanoq apeqqutaatigiva? Pisinermi tusarnaagassiinissaq imaluunniit niuernikkut eqqarsaatersuutit eqqarsaatigalugu sorleq siullertut eqqarsaatigineqarpa?**

**7: Radiokkut TV-kkullu innuttaasunik kiffartuussinissap tamakkiisumik pisortanit aningaasalersorneqarnera eqqarsaatigalugu ussasaarutitigut isertitaqarnissaq Naalakkersuisut isumaat naapertorlugu qanoq naapertuutsigiva?**

**8: Sumiiffimmi radiomik pisinnginnermini KNR-ip Naalakkersuisut eqqartueqatigisimavai? Taamaangippallu KNR-ip Naalakkersuisullu tugassiorfittut innuttaasunik kiffartuussisussatut naammassisaqarnissamut isumaqatigiissutrqaesimanginnerat (inatsisunik atuuttunik akerliusumik) eqqarsaatigalugu tamanna naammaginartuunerpa?**

**9: KNR-ip radioqarfimmik pisineranut tamatumalu qanoq ingerlasimaneranut atatillugu Naalakkersuisut allanik oqaasissaqarpat?**

(Inatsisartuni ilaasortaq, Mimi Karlsen, Inuit Ataqatigiit)

### **Tungavilersuut:**

KNR-ip sumiiffimmi radiomik "Voice of Greenland"-imik pisisimamera tusagassiutitigut tusarpara.

KNR-ip pisortaa tusagassiutitigut oqaaseqartinneqarpoq kanali taanna web-ikkut radiokkut tusarnaarutaagallartoq Nuummi FM-kanalimik ilaqarluni, taamaattorli sinerissap sinneranut FM-kkut signalip siaruartinneqarnissaa KNR-imit sulissutigineqartoq. Nunarpullu tamarmi tusarnaarsinnaangorlugu kanalip nutaap DVBT-båndemut akuutinneqalernissaa (TV-kkut radiokkullu kanalit akeqanngitsut allat peqatigalugit) sulissutigineqartoq.

Tusagassiutitigut tusakkat naapertorlugit KNR-ip pisereernermi kingornatigut aatsaat FM-båndimut qinnuteqarlunilu aallakaatitsisinaanissamut akuersisummik pisimavoq.

Tusagaasiutit naapertorlugit radioqarfik KNR-imi sulisumit 500.000 kr.-ilerlugu pisiarinqarsimavoq. KNR-ip pisortaa tusagassiutinut oqaaseqartitaalluni oqarpoq nipilersukkat, nipilersukkanut allattorsimaffik, atortut, nittartagaq, app-i, sulisut ussassaarusionermilu atortut naammasseriikkat pisinermi ilaasut. Inuussutissarsiuteqartulli allattorsimaffiat naapertorlugu Voice of Greenland ingerlatsiviuvoq sulisoqanngitsaq.

KNR-i naapertorlugu kukkunersiuinermik ingerlatsiviup Deloitte pisinnginnermi Voice of Greenlandip naliganik naliliisinqarsimavoq. KNR-ip pisortaa tusagassiutitigut oqaaseqartinneqarluni paasissutissiivoq Deloitte naliliinera tungavigalugu pisineq pitsaasuusutut nalilerneqarsimasoq. Tusagassiutitigut paasissutissiineq naapertorlugu KNR-i ussassaarutitigut ukiumut 1 mio. kr.-inik isertitaqarsinnaanissamik naatsorsuutiginnittoq oqaatigineqarpoq.

Ullut suliffiusut qulit iluanni apeqqutit tamakkerlutik akineqarnissaat qinnutigissavara.